

An Chomhairle um Oideachas
Gaeltachta & Gaelscolaíochta



Comórtas oscailte chun Oifigeach Oideachais Bunscoile
a cheapadh

Leabhrán Eolais

Mí na Bealtaine 2022

Oifigeach Oideachais Bunscoile sa Chomhairle um Oideachas Gaeltachta agus Gaelscolaíochta

1. An ceapachán

Bunaíodh an Chomhairle um Oideachas Gaeltachta agus Gaelscolaíochta (COGG) faoi fhorálacha Alt 31 den Acht Oideachais 1998 le comhairle a chur ar an Aire Oideachais agus ar an gComhairle Náisiúnta Curaclaim agus Measúnachta maidir le teagasc trí Ghaeilge sna bunscoileanna agus sna hiar-bhunscoileanna Gaeltachta agus lán-Ghaeilge agus maidir le teagasc na Gaeilge i scoileanna uile na tíre, chomh maith le soláthar áiseanna teagaisc a chomhordú, seirbhísí taca a chur ar fáil agus taighde a sheoladh.

Is mian le COGG Oifigeach Oideachais Bunscoile a cheapadh a thacóidh leis an obair seo.

D'fhéadfadh, ach ní gá, gur ar bhonn iasachta a dhéanfar an ceapachán. Conradh bliana ar théarma seasta a bheidh i gceist.

2. Dualgais an phoist

Beidh an tOifigeach Oideachais Bunscoile freagrach as

- comhordú ábhar teagaisc i nGaeilge do gach ábhar curaclaim sna bunscoileanna Gaeltachta agus lán-Ghaeilge chomh maith le hábhar teagaisc agus foghlama do theagasc na Gaeilge i mbunscoileanna ina bhfuil an Béarla mar mheán, i gcomhthéacs an Churaclaim Teanga Bunscoile.
- comhairle a chur ar fáil go leanúnach maidir le háiseanna atá ar fáil agus úsáid na n-áiseanna sin a chur chun cinn i measc na scoileanna
- riarachán a dhéanamh ar an measúnú a bhaineann leis an scéim a mhaoiníonn áiseanna bunscoile
- monatóireacht ar fhorbairt na n-áiseanna bunscoile atá á maoiniú ag COGG
- seirbhísí taca a chur ar fáil (comhdhálacha, cúrsaí, ceardlanna, Vein COGG agus a leithéid)
- comhfhreagras leis an bpobal, freastal ar chruinnithe agus gnáthchúraim riaracháin eile

3. Riachtanais

Caithfidh na hiarratasóirí ar fad:

- **a bheith cáilithe mar mhúinteoirí nó an-taithí a bheith acu ar fhorbairt áiseanna teagaisc do scoileanna,**
- eolas cuimsitheach a bheith acu ar chóras oideachais na hÉireann, oideachas Gaeltachta agus lán-Ghaeilge ach go háirithe,
- eolas cuimsitheach a bheith acu ar theagasc na Gaeilge,
- ardchaighdeán a bheith acu i labhairt agus i scríobh na Gaeilge,
- sárscileanna cumarsáide agus cur i láthair a bheith acu,
- scileanna sa teicneolaíocht dhigiteach a bheith acu.

Inmhianaithe

- Cáilíocht TEG, Leibhéal B2 nó níos airde.
- Taithí ar fhorbairt áiseanna teagaisc
- Taithí ar theagasc i scoil Ghaeltachta nó/agus lán-Ghaeilge nó/agus i scoil ina bhfuil an Béarla mar mheán teagaisc.
- Cáilíocht iarchéime ábhartha
- Scileanna agus taithí ar a bheith ag obair le suíomhanna gréasáin agus le meáin dhigiteacha

4. Luach saothair

Seo a leanas scálaí tuarastail an Oifigigh Oideachais:

56,278 59,860 62,413 65,064 67,716 70,338 72,543 77,626 82,214 86,873 90,655
93,575 BFS*1 96,504 BFS2 *Incrimint fadseirbhíse

Ceanglaíonn beartas an Rialtais gach post a líonadh ag an gcéad pointe den scála. Ach duine ar bith a cheapfar ar iasacht ón earnáil oideachais agus a bhfuil tuarastal níos airde acu ná an chéad pointe de scála na n-oigifeach oideachais féadfaidh é/í a chur ag pointe oiriúnach ar an scála cuí. Féach go bhfuil liúntais agus a gcur chun feidhme faoi réir athbhreithniú leanúnach ag an Roinn Caiteachais Phoiblí agus Athchóirithe agus d'fhéadfaí iad a athrú. Lena chois sin, d'fhéadfaí an ráta luach saothair a athrú ó am go chéile ar aon dul le beartas pá an Rialtais agus tá an tuarastal faoi réir gach asbhaint reachtúil, lena n-áirítear asbhaintí a bhaineann le pinsean.

5. Saoire bhliantúil

Tríocha lá oibre a bheidh sa liúntas saoire bhliantúil, pro rata d'fhad an chonartha. Liúntas é sin a bheidh faoi réir na ngnáthchoinníollacha maidir le deonú saoire bhliantúil agus atá bunaithe ar sheachtain oibre cúig lá. Ní áireofar air na gnáthlaethanta saoire phoiblí.

6. Suíomh

Tá oifig ag COGG ag 23 Plás Windsor, Baile Átha Cliath 2. **Beidh ar an té a cheapfar a bheith i láthair san oifig go rialta ach** d'fhéadfaí socruithe oibre neamhchaighdeánacha a éascú **go hócáidiúil**, ar a n-áirítear obair i suíomh oifige gar don bhaile.

7. Comhdheiseanna

Eagraíocht chomhdheiseanna is ea COGG.

8. Eagar an chomórtais

Tá an ceart ag COGG iarratasóirí a ghearrliostú.

Déanfar seo de réir chomhlíonadh na riachtanas thuasluaite.

Seolfar ríomphost le sonraí agallaimh chuig na hiarratasóirí ar an ngearrliosta.

Beidh na hagallaimh ar siúl i mBaile Átha Cliath.

Ar bhonn **agallamh iomaíoch** a dhéanfar an roghnú. Beidh an t-agallamh bunaithe ar na hinniúlachtaí a bheidh riachtanach chun dualgais agus freagrachtaí an phoist a chomhlíonadh, faoi mar atá leagtha amach sna liostaí riachtanas don phost:

- Cáilithe mar mhúinteoirí nó an-taithí a bheith acu ar fhorbairt áiseanna teagaisc
- Cáilíocht ábhartha iar-chéime
- Eolas cuimsitheach ar chóras oideachais na hÉireann, oideachas Gaeltachta agus lán-Ghaeilge ach go háirithe
- Taithí teagaisc
- Sárscileanna cumarsáide agus idirphearsanta
- Scileanna sa teicneolaíocht dhigiteach
- Ardchaighdeán i labhairt agus i scríobh na Gaeilge:

Roimh an bpríomhagallamh, beidh triail scríofa Ghaeilge ag leibhéal B2 Gradam den Fhráma Tagartha Eorpach le déanamh ag iarratasóirí (Féach www.teg.ie) .

9. Iarratais

Ní mór d'iarratasóirí litir iarratais ag léiriú mar a chomhlíonann siad riachtanais an phoist agus CV (le hainmneacha beirt mholtóirí) a chur ar fáil.

Iarrtar go gcuirfí seoladh ríomhphoist agus uimhir ghutháin póca ar fáil leis an iarratas.

An tAcht um Chosaint Sonraí 1988/2003

Nuair a fhaightear d'iarratas, cruthaítear taifead i d'ainm le pé eolas pearsanta a chuireann tú ar fáil. Is don phróiseas earcaíochta amháin a úsáidfean an t-eolas sin. Is faoi réir fhorálacha na nAchtanna um Chosaint Sonraí 1988 agus 2003 a dhéanfar seo. Tá de cheart agat faoi fhorálacha na nAchtanna sin aon eolas a bhaineann leat a fháil ag am ar bith. Trí iarratas a dhéanamh tá cead á thabhairt agat dúinn do shonraí pearsanta a phróiseáil, fiú más íogair iad. Scríosfar do shonraí pearsanta tar éis tréimhse 12 mhí.

10. An dáta druidte

Ní mór an litir iarratais agus an CV a bheith faighte ag poist@cogg.ie ag tráth nach moille ná **8 i.n. Dé Céadaoin an 25 Bealtaine 2022.**

Admhófar gach iarratas agus sa chás nach bhfaightear admháil laistigh de 5 lá, is ceart é sin a chur in iúl d'Oifig COGG. Is ceart athrú ar sheoladh poist agus/nó ar sheoladh ríomhphoist a chur in iúl láithreach.

11. Cáilitheacht

Meabhraítear nach ceadmhach d'iarratasóirí cur isteach ar an gcomórtas seo má bhain siad tairbhe as na scéimeanna scoir seirbhís phoiblí leagtha amach thíos.

An Scéim Luathscoir Dreasaithe (SLSD)

Coinníoll is ea é den Scéim Luathscoir Dreasaithe, mar atá leagtha amach in Imlitir 12/09 na Roinne Airgeadais, toirmeasc a bheith ar lucht scoir, faoin scéim sin, iarratas a dhéanamh ar phost eile san fhostaíocht nó san earnáil chéanna. Mar sin ní ceadmhach don lucht scoir iarratas a dhéanamh ar an bpost seo.

Imlitir na Roinne Oideachais agus Scileanna 7/2010

Tugadh isteach le hImlitir 7/2010 na Roinne Sláinte agus Leanaí Spriocscéimeanna le haghaidh Luathscor Deonach (VER) agus Iomarcaíocht Dheonach (VRS). Coinníoll is ea é den scéim VER nach mbeidh daoine a bhaineann leas as an scéim cáilithe lena n-athfhostú in earnáil na sláinte poiblí ná sa tseirbhís poiblí i gcoitinne ná i gcomhlacht a mhaoinítear go hiomlán nó go páirteach le hairgead poiblí. Baineann an toirmeasc céanna ar athfhostú leis na scéimeanna iomarcaíochta ach amháin nach mairfidh an toirmeasc ach seacht mbliana, agus go mbeidh athfhostú ina dhiaidh sin faoi réir cheadú an Aire Caiteachais Phoiblí agus Athchóirithe. Níl daoine a bhain leas as aon cheann den dá scéim sin cáilithe le cur isteach ar an gcomórtas seo.

Dearbhú:

Iarrfar ar iarratasóirí dearbhú a thabhairt cé acu a bhain siad nó nár bhain siad leas roimhe seo as scéim luathscor dreasaithe seirbhís poiblí. Beidh ar iarratasóirí, leis, dearbhú a thabhairt maidir le haon teidlíocht atá acu ar phinsean Seirbhís Phoiblí (atá á híoc nó á chaomhnú) ó aon fhostaíocht Seirbhís Phoiblí eile agus/nó cé acu a fuair siad nó nach bhfuair siad íocaíocht in ionad i dtaca le haon seirbhís in aon fhostaíocht Seirbhís Phoiblí.

12. Rúndacht

Faoi réir fhorálacha an Achta um Shaoráil Faisnéise, 1997, déileálfar le hiarratais faoi rún daingean.

13. Freastal ar agallamh

Faoi na hiarratasóirí a bheidh sé a bheith ar fáil chun agallaimh agus pé socruithe is gá a dhéanamh chun a chinntiú go bhfaighidh siad teachtaireachtaí a sheolfar chucu ag an seoladh r-phoist a shonraítear san iarratas. Ní bheidh COGG freagrach as costais arna dtabhú ag iarratasóirí.

16. Ceisteanna

Féadfar ceist ar bith mar gheall ar an bpróiseas nó ar an ról a sheoladh chuig poist@cogg.ie